



Senin, 07 Juni 2021

Ogen : Masmur 106 : 3



"Patuh"



Tupung erjabu anak impalku reh aku ndahisa ku sada jambur si galang kal, aku reh make masker, kubaba handsanitezer ras la kusalami kade-kade si nggo leben reh asangken aku, kuciremi, kuban salam covid, janah kujaga jarak perkundulku. Tapi minter ka nge lit keluarga si ngerana, ena alo alo pandita ena nake, mbiar kal ia covid la kita sada pe salamina. Si kugejapken labo soal mbiar la mbiar covid entah pe mbiar mate tapi perlu ijaga prokes (protokol kesehaten) gelah radu ras kita njaga kesehatenta. I bas kondisinta si genduari enda adi radu ras kita njagasa enda ertina si ergan, gelah ula sada pe kita kena. Mawen-mawen reh ku Gereja mbiar kita, Pjj la pang, PA lenga ilakoken perban njaga gelah ola lit terpapar, padahal ku kerja kerja 1.000 kalak pulung bas jambur alu la njaga protokol kesehaten la si akap dalih. Perlu kal kita metenget. Reh tambahna kalak si kena covid adi la kita njaga prokes, ula mudik nina pemerintah je ka kita mudik. Banci saja ritual keagamanta erbahansa reh tambahna covid 19 erkiteken la kita njaga prokes sada ras sidebanna. Deba lit ka nge jelma si la tek lit covid, akapna e akal akalen pemerintah. Emaka labo ia patuh ngikuti prokes. Lit ka deba mbiar kal covid emaka la ia ndarat, i rumah saja ia erdahin, belanja pe suruhna kalak, vitamin lengkap, tapi kena covid ka. Mawen labo si eteh i ja kita kenana. Ertina arah kai si jadi i sekelewetta perlu kal kita metenget, ula mbiar, ula ka melantar sabap i bas kita melantar e banci je kita kena. Arah Kata Dibata Masmur 106:3 "malem kal ate kalak si ngikutken perintah perintahNa, si katawari pe ngelakoken si benar." Keptuhen i bas ngikutken prentah Tuhan maba kemalemen ate ras keselamatan. Sabap Kata Dibata e mabai kegeluhenta ku si terulin. La obahna ras kepatuhennta ngikutken protokol kesehaten, banci nambahi kesehaten, keamanan ras kemalemen ateta.